



An tAcht Craolacháin 2009

An Scéim Maoinithe

chun Bunábhar Clár a Chartlannú

(“Scéim um Chartlannú 2”)

Meitheamh 2018



Clár Ábhar

1. Cúlra
2. Cuspóirí
3. Ról Údarás Craolacháin na hÉireann (BAI)
4. Cáilitheacht i gcomhair Maoiniú
 - 4.1 A bheith incháilithe chun Iarratas a dhéanamh ar Mhaoiniú
 - 4.2 Bunábhar Clár atá Incháilithe
 - 4.3 Tionscadail atá Incháilithe
 - 4.4 Téamaí agus Seánraí
5. Maoiniú
 - 5.1 Dáileadh na gCistí
 - 5.2 Céatadán an Mhaoinithe atá ar Fáil
 - 5.3 Babhtaí Maoinithe
 - 5.4 Treoirínte
 - 5.5 Critéir maidir le Maoiniú a Dheonú
6. Feidhmiú na Scéime
 - 6.1 An Próiseas Iarratais
 - 6.2 An Próiseas Measúnaithe agus Cinnteoireachta
 - 6.3 Maoiniú a Dheonú agus an Dualgas Conradh a Dhéanamh leis an BAI
 - 6.4 An Maoiniú a Admháil
 - 6.5 Monatóireacht agus Meastóireacht

Aguisín 1 - An tAcht Craolacháin, 2009 (na hailt is infheidhme)

Aguisín 2 - Critéir mheasúnaithe



1. Cúlra

Is scéim tacaíochta í an Scéim um Chartlannú 2, arna cur i bhfeidhm ag an BAI tríd an táille ceadúnais teilifíse, chun cultúr cartlainne a fhorbairt agus a chur chun cinn san earnáil craolacháin in Éirinn ina iomláine, ag cur le cosaint oidhreacht na hÉireann.

Beidh an scéim éifeachtach ar feadh tréimhse cúig bliana (2018-2022) agus is í seo an dara scéim den sórt sin. Maidir leis seo, bunaíodh an Scéim um Chartlannú de bhun alt 154(1)(e) faoi Chuid 10 den Acht Craolacháin 2009 ("An tAcht 2009"). Cuireadh tús leis an gcéad scéim i mí na Bealtaine 2012 agus cuireadh trí bhabhta maoinithe i bhfeidhm agus mar thoradh air sin tugadh breis is €5 mhilliún i maoiniú do 14 iarratasóir rathúil. Rinneadh athbhreithniú neamhspleách ar an gcéad scéim sin agus críochnaíodh é in 2017 agus chabhraigh na torthaí sin le paraiméadair agus ceanglais na dara scéime seo.

Leagtar amach sa doiciméad seo na heilimintí tábhachtacha den Scéim um Chartlannú 2 i dtéarmaí cuspóirí, ról an BAI, incháilitheacht, maoiniú atá ar fáil agus cúrsaí oibríochta.

2. Cuspóirí

Is ar na forálacha reachtúla atá cuspóirí na Scéime um Chartlannú 2 bunaithe agus cuireann siad tagarmharc agus comhthéacs foriomlán ar fáil ina ndéanfaidh an tÚdarás an scéim a bhunú, a bhainistiú agus a riaradh. Tá trí chuspóir leagtha amach, mar seo a leanas:

- (i) **Cur chuige comhtháite** a fhorbairt i leith cartlannú bunábhar clár a tháirgtear sa Stát le go dtabharfar san áireamh cur chun cinn, forbairt agus cumhdach oidhreacht chraolacháin na hÉireann. Áireofar air seo cartlannú bunábhar clár a chur chun tosaigh ionas go mbainfidh craoltóireacht na hÉireann tairbhe as sin agus chun go gcuirfear feabhas ar caighdeán an chraolacháin sin;
- (ii) **Próisis agus formáidí stórála** a fhorbairt chun uchtach agus cúnamh a thabhairt do chomhlachtaí ar mhaithe le hathchóiriú agus/nó stóráil ábhair atá ar fhoráidí atá ag dul i léig nó a bheidh as feidhm ar fad go luath;
- (iii) Socrú a dhéanamh go mbeidh **teacht ar bhunábhar clár** ar bhealach gasta cruinn ag dreamanna ar spéis leo an t-ábhar sin agus feabhas a chur ar an eolas atá ag an bpobal ar chaomhnú agus úsáid ábhar craolacháin atá i gcartlanna.



3. Ról Údarás Craolacháin na hÉireann (BAI)

Faoi théarmaí an Achta Craolacháin, 2009, tá freagracht ar an BAI as foirmlíú, bainistíocht agus riaradh Scéime chun forbairt cur chuige comhtháite a mhaoiniú i leith cartlannú bunábhar clár a tháirgtear sa Stát. Agus é á dhéanamh sin, beidh cur chuige straitéiseach ag an BAI i leith na Scéime seo, bunaithe ar na tosaíochtaí atá sonraithe anseo thíos:

- (i) **Struchtúir a bhunú** lena ndírítear ar chuspóirí na Scéime agus lena gcinntítear dáileadh éifeachtach an mhaoinithe ar thionscadail arb é a n-aidhm na cuspóirí sin a chur chun tosaigh;
- (ii) **Naisc láidre a dhéanamh agus meicníochtaí a bhunú** le haghaidh dialóg leis an earnáil chraolacháin, tionscal na fógraíochta, gníomhaireachtaí san earnáil phoiblí, agus réimsí ábhartha eile den earnáil, chun treochtaí i gcartlannú bunábhar clár agus i réimsí ábhartha eile a mheas;
- (iii) **Solúbthacht a choinneáil slán** i struchtúir na Scéime ar mhaithe le dea-riaradh agus dea-bhainistíocht na Scéime ionas go mbeifear in ann gníomhú go héifeachtach i leith riachtanais na hearnála craolacháin agus réimsí gaolmhara agus ionas go mbainfear cuspóirí na Scéime amach.

Agus an cur chuige seo aige, tá rún ag an BAI a chion féin a dhéanamh ar mhaithe le caomhnú, buanchoimeád agus athchóiriú oidhreacht chraolacháin na hÉireann do na glúine amach romhainn.



4. Cáilitheacht i gcomhair Maoiniú

4.1 A bheith incháilithe chun iarratas a dhéanamh ar Mhaoiniú

Beidh siad seo a leanas incháilithe chun iarratas a dhéanamh ar Mhaoiniú faoin Scéim um Chartlannú 2:

- Craoltóirí (poiblí, tráchtála agus pobail);
- Fógróirí;
- Daoine/institiúidí a bhfuil ábhar ábhartha ina seilbh;
- Daoine/institiúidí atá in ann ábhar a mheastar a bheith luachmhar ó thaobh an Stáit de a chartlannú;
- Daoine/institiúidí atá in ann cuspóirí na Scéime a chur chun tosaigh e.g. trí thaighde etc.

4.2 Bunábhar Clár atá Incháilithe

Áireofar na nithe seo a leanas ar an mbunábhar clár a bheidh incháilithe le haghaidh maoiniú:

- Ábhar teilifíse a craoladh go hiomlán nó go páirteach nó a taifeadh lena chraoladh;
- Ábhar raidió a craoladh go hiomlán nó go páirteach nó a taifeadh lena chraoladh;
- Ábhar fógraíochta nó ábhar gaolmhar a craoladh go hiomlán nó go páirteach nó a taifeadh lena chraoladh;
- Íomhánna socra a táirgeadh ón ábhar sin nó a táirgeadh i gcomhthéacs an ábhair sin a bheith á thaifeadh;
- Grianghraif a táirgeadh ón ábhar sin nó a táirgeadh i gcomhthéacs an ábhair sin a bheith á thaifeadh;

4.3 Tionscadail atá Incháilithe

Áireofar na tionscadail seo a leanas ar na tionscadail a bheidh incháilithe le haghaidh maoiniú:

- Cartlannú Bunábhar Clár faoi mar atá leagtha amach ag 2 thuas.
- Tionscadail atá gaolmhar le cúrsaí cartlannaithe, ar nós: taighde, anailís ar riachtanais, anailísí, staidéir féidearthachta agus tionscadail phiólótacha, ar a



n-áirítear tionscadail a dtugann an tAire Roinn Cumarsáide, Gníomhaithe ar son na hAeráide agus Comhshaoil fúthu thar ceann an Aire.

4.4 Téamaí agus Seánraí

Tabharfar aird faoi leith ar chartlannú Bunábhar Clár ina gcaomhnaítear taifead staire ar chultúr, oidhreacht agus eispéireas na hÉireann agus ina gcuidítear le cur chuige comhtháite a fhorbairt i leith cartlannú bunábhar clár a tháirgtear sa Stát, ar a n-áirítear Bunábhar Clár:

- Atá i nGaeilge;
- A bhaineann le cultúr agus saol na hÉireann;
- A bhaineann le ceol, drámaíocht agus siamsaíocht na hÉireann;
- Ar ábhar nuachta, cúrsaí reatha nó clár faisnéise é;
- Atá in aon chatagóir eile atá sonraithe ag an BAI agus is fiú a choimeád agus a chaomhnú dar leis an BAI.

Féadfaidh siad seo a leanas a bheith ar na seánraí clár, ar chuntar go ndearnadh iad uile lena gcráoladh agus/nó gur craoladh iad uile:

- Cláir faisnéise
- Cláir Urlabhra
- Cláir Spóirt
- Cláir Cheoil
- Cláir do Pháistí
- Scannáin Éireannacha



5. Maoiniú

Déanfar an Scéim um Chartlannú 2 a mhaoiniú trí chéatadán den Chiste Craolacháin bliantúil, a bunaíodh de bhun Alt 157 den Acht Craolacháin 2009. Meastar gur 20% ar a mhéad den Chiste Craolacháin iomlán a leithdháilfear ar chartlannú in aon bhliain ar leith.

5.1. Dáileadh na gCistí

Cuirfidh an BAI in iúl d'iarrthóirí ionchasacha cineál an bhabhta maoinithe, cibé acu atá oscailte nó réamh-sannta. Maidir leis sin, d'fhéadfadh an BAI a chinneadh buiséid a shannadh roimh ré do chatagóirí ar leith iarratasóirí nó tionscadal maidir le babhta ar leith. Beidh cinntí den chineál seo bunaithe ar chuspóirí na Scéime a chur chun tosaigh, ar anailís ar na hiarratais a bheidh faighte, agus ar mhéid iomlán an mhaoinithe a bheidh ar fáil an t-am sin.

5.2. Céatadán an Mhaoinithe atá ar Fáil

Deonóidh an BAI deontais faoin Scéim um Chartlannú 2 agus is 80%, ar a mhéad, den bhuiséad iomlán a bheidh de dhíth de réir thogra an iarratasóra. Beidh sé de dhualgas ar iarratasóirí a léiriú go bhfuil maoiniú eile agus/nó maoiniú meaitseála ar fáil dóibh, gur leor an maoiniú sin, agus beidh orthu foinse an mhaoinithe sin a thabhairt le fios. Ní féidir cistí ó scéimeanna eile de chuid an BAI a thabhairt san áireamh anseo.

Agus cinneadh á dhéanamh faoin gcéatadán maoinithe a bheidh le deonú do thionscadal áirithe, cuirfear roinnt cúinsí éagsúla san áireamh; orthu sin beidh an fháil atá ar mhaoiniú ó fhoinsí eile, agus a mhéad a chomhlíonann an togra cuspóirí na Scéime. Is faoi na hiarratasóirí a bheidh sé a léiriú don BAI conas a thiocfar ar an gcuid eile den mhaoiniú a bheidh ag teastáil le haghaidh tionscadal áirithe.

5.3. Babhtaí Maoinithe

Tabharfaidh an BAI isteach babhta nó babhtaí maoinithe le haghaidh tionscadail a bhaineann le cartlannú bunábhar clár ar bhonn bliantúil. Beidh líon na mbabhtaí maoinithe ag brath ar líon agus cineál na n-iarratas a gheofar. D'fhéadfadh an BAI freisin maoiniú ilbhliantúil a thairiscint (tréimhse dhá bhliain nó níos faide) in imthosca áirithe. In aon chás, ní leithdháilfear maoiniú ar bith d'aon tréimhse i ndiaidh ré fhaofa na Scéime.



5.4. Treoirlínte

Agus iarratais ar mhaoiniú faoin Scéim um Chartlannú 2 á lorg aige:

- Foilseoidh an BAI treoirlínte ar mhaithe le hiarratasóirí agus a gcuid tograí á n-ullmhú acu. Tharlódh nárbh ionann iad seo ó bhabhta go babhta ach tabharfar san áireamh go mbeidh an BAI ag iarraidh tacaíocht a thabhairt do chartlannú ar ardchaighdeán a chuirfidh le hoidhreacht chraolacháin na hÉireann.
- Féadfaidh an BAI catagóirí áirithe tionscadal a shonrú, agus treoirlínte a fhoilsiú i gcomhair iarratasóirí dá réir.
- Fógróidh an BAI go poiblí go bhfuil iarratais ar mhaoiniú á lorg aige.

5.5. Critéir maidir le Maoiniú a Dheonú

Déanfar na hiarratais a mheas faoi na critéir atá leagtha amach in Aguisín 2.



6. Feidhmiú na Scéime

6.1 An Próiseas Iarratais

Faisnéis a fhoilsiú

Maidir le gach babhta maoinithe foilseoidh an BAI treoirínte le haghaidh iarratasóirí ionchasacha agus áireofar sna treoirínte sin eolas maidir le cáilitheacht agus critéir don mheasúnú, foirm iarratais chaighdeánach mar aon le faisnéis bhreise de réir mar is gá. De thoradh foirm iarratais chaighdeánach a bheith foilsithe, beidh tuiscint ghrinn ag iarratasóirí ar an eolas is gá a sholáthar, agus beifear in ann na hiarratais a mheas ar bhonn comparáideach comhsheasmhach.

Foirm Iarratais

Cuirfidh an BAI cóip chrua agus/nó leagan leictreonach den fhoirm iarratais ar fáil má iarrtar sin agus beidh fáil orthu sin freisin ar láithreán gréasáin an BAI.

Clár ama le haghaidh na n-iarratas

Beidh sé seachtaine ar a laghad ag iarratasóirí chun iarratas, ar a n-áirítear faisnéis bhreise, a ullmhú agus chun ceisteanna a bheadh acu i dtaobh an phróisis iarratais a chioradh le foireann an BAI.

Iarratais a chur isteach

Ní mór foirmeacha iarratais comhlánaithe, mar aon leis an bhfaisnéis bhreise go léir, a chur faoi bhráid an BAI faoi na spriocdhátaí foilsithe. Ní ghlacfar le hiarratais i ndiaidh an spriocdháta. Ar mhaithe le próiseáil na n-iarratas a éascú, iarrfaidh an BAI cóip chrua agus leagan leictreonach araon den iarratas comhlánaithe.

6.2 An Próiseas Measúnaithe agus Cinnteoireachta

Trí chéim a bheidh sa Phróiseas Measúnaithe agus Cinnteoireachta don Scéim um Chartlannú. Is iad sin:

Réamh-mheastóireacht

Déanfar an réamh-mheastóireacht lena chinntiú go bhfuil iarratasóir incháilithe le maoiniú a fháil faoin Scéim. Cuspóir eile a bhaineann leis an réamh-mheastóireacht is ea deimhin a dhéanamh de go bhfuil iarratasóir tar éis na nósanna imeachta go léir a chomhlíonadh, i gcomhréir le treoirínte iarratais an BAI, agus gur cuireadh isteach an fhaisnéis go léir atá de dhíth.

Iarratais ar bith nach n-éireoidh leo faoin réamh-mheastóireacht, cuirfear as an áireamh iad agus ní dhéanfar aon bhreithniú eile orthu. Níos imeachta inmheánach



a bheidh sa réamh-mheastóireacht, agus is comhaltaí foirne cuí de chuid an BAI a bheidh ina bun.

Measúnú straitéiseach

Tionólfar painéal nó painéil mheasúnaithe ar a mbeidh comhaltaí foirne cuí de chuid an BAI, ionadaí nó ionadaithe ó thionscail an chraolacháin nó na fógraíochta (as Éirinn nó thar lear) agus speisialtóir(i) a bhfuil saineolas acu ar chartlannú bunábhar clár.

Is ann don chéim seo le gur féidir gach uile iarratas a mheas go hiomlán faoi chuspóirí straitéiseacha leathana na Scéime um Chartlannú agus faoi gach ceann de na critéir ábhartha atá leagtha amach in Aguisín 2. Leagfar de chúram ar phainéal measúnaithe pacáiste moltaí a chur le chéile agus beidh siad sin le breithniú agus le faomhadh ag an Údarás.

Cinneadh deiridh

Sa tríú céim (an chéim dheiridh) den phróiseas measúnaithe, déanfaidh an tÚdarás an cinneadh deiridh i dtaobh maoiniú a dheonú d'iarratasóir nó iarratasóirí; tabharfaidh sé san áireamh moltaí ó phainéal measúnaithe agus comhaltaí foirne cuí sa BAI, an méid maoinithe a bheidh ar fáil, agus aon ní ábhartha eile is cuí leis an BAI. Tá de cheart ag an BAI gan aon mhaoiniú a dheonú d'aon iarratasóir agus coinníoll amháin nó níos mó a chur le deonú an mhaoinithe.

6.3 Maoiniú a Dheonú agus an Dualgas Conradh a Dhéanamh leis an BAI

Tar éis dó na hiarratais a mheas, scríobhfaidh an BAI chuig gach iarratasóir ar bhonn foirmiúil agus cuirfear cinneadh an BAI in iúl dóibh dá réir. Más cinneadh diúltach a thugtar i leith an iarratais ar mhaoiniú, tabharfaidh an tÚdarás cúiseanna lena chinneadh.

I gcás na n-iarratasóirí a n-éireoidh lena n-iarratas, beidh na nósanna imeachta seo i bhfeidhm:

- Cuirfidh an BAI an cinneadh in iúl don iarratasóir i scríbhinn, agus leagfar amach ansin aon choinníoll a bhaineann le deonú an mhaoinithe.
- Iarratasóirí a n-éireoidh lena n-iarratas, ní mór dóibh deimhniú a thabhairt i scríbhinn go bhfuil siad ag glacadh leis an tairiscint ar mhaoiniú agus le haon choinníoll a chuir an BAI leis an tairiscint sin.



- Iarratasóirí a n-éireoidh lena n-iarratas, beidh orthu comhaontú conarthach (“Conradh Maoinithe”) a dhéanamh leis an BAI, ar téarmaí a bheidh le sonrú ag an BAI. Áireofar ar na téarmaí sin sceideal a bhaineann leis an gcaoi a dtarraingeoidh an t-iarratasóir anuas na gcistí.
- Riarfaidh an BAI na cistí i gcomhréir le téarmaí an Chonartha Maoinithe.

6.4 An Maoiniú a Admháil

Iarratasóirí a n-éireoidh lena n-iarratas, caithfidh siad an tacaíocht mhaoinithe atá faighte acu ón Scéim um Chartlannú agus ón BAI a admháil, ar bhealach is cuí leis an BAI.

6.5 Monatóireacht agus Meastóireacht

Déanfaidh an BAI monatóireacht agus meastóireacht leanúnach ar na gnéithe teilifíse, raidió agus fógraíochta ón am a gcuirfear tús le gach ceann acu sin. San athbhreithniú sin, breithneofar cineál na n-iarratas a fuarthas, an próiseas cinnteoireachta ar a n-áirítear na critéir a chuir an BAI i bhfeidhm i leith na gcásanna sonracha agus na gcatagóirí éagsúla iarratasóirí. Tabharfar aird ar thorthaí an phróisis athbhreithnithe seo nuair a bheidh cinntí á ndéanamh amach anseo ag an BAI i dtaca le forbairt Scéimeanna eile.

Tréimhse cúig bliana a bheidh ag an Scéim um Chartlannú i dtosach. Ag deireadh Bhliain 4, athbhreithneoidh an BAI feidhmiú, éifeachtúlacht agus tionchar ar an gcráolachán trí chéile, agus ar chleachtais chartlannaithe agus faighteoirí an mhaoinithe go sonracha.

Is é an aidhm is tábhachtaí atá leis an athbhreithniú an tionchar atá ag an Scéim a thomhas agus breithmheas a thabhairt ar chumas na Scéime a cuid cuspóirí a bhaint amach. D’fhonn an anailís seo a chur i gcrích, díreofar san athbhreithniú ar gach réimse den Scéim.



Aquisín 1 - An tAcht Craolacháin, 2009

1.1. Réamhrá

Achtaíodh an tAcht Craolacháin, 2009 ar an 12 Iúil 2009. Faoin Acht, tugadh treoir d'Údarás Craolacháin na hÉireann (BAI) Scéim a fhorbairt chun bunábhar clár a tháirgtear sa Stát a chartlannú. Tugtar na forálacha ábhartha den Acht anseo thíos.

2.2. An tAcht Craolacháin, 2009 (arna leasú)

Alt 153

Ciallaíonn “Bunábhar Clár” bunábhar closamhairc nó clos-bhunábhar, lena n-áirítear bunábhar fógraíochta agus bunábhar den tsamhail sin, a craoladh go hiomlán nó go páirteach nó ar thaifeadadh é lena chraoladh, agus folaíonn sé íomhánna socra agus grianghraif arna dtáirgeadh as bunábhar den sórt sin nó i gcomhthéacs an bunábhar sin a thaifeadadh.

Alt 154

(1) Déanfaidh an t-Údarás scéim nó roinnt scéimeanna a ullmhú agus a chur faoi bhráid an Aire lena ceadú nó lena gceadú aige nó aici, is scéim nó scéimeanna chun cistí a dheonú d'fhonn tacú leis na nithe seo a leanas go léir nó le haon ní acu—

(a) cláir nua teilifíse nó craolacháin fuaimne, lena n-áirítear príomhscannáin, saothair bheochana agus drámaíocht faoi chultúr, oidhreacht agus taithí na hÉireann, lena n-áirítear—

- (i) an stair (lena n-áirítear an stair a bhaineann le limistéir nó grúpaí áirithe nó le gnéithe áirithe taithí, gníomhaíochta nó tionchair),
- (ii) foirgnimh stairiúla,
- (iii) an timpeallacht nádúrtha,
- (iv) an daon-oidhreacht, oidhreacht na tuaithe agus an oidhreacht dhúchasach,
- (v) na healaíona traidisiúnta agus comhaimseartha,
- (vi) an Ghaeilge, agus
- (vii) taithí na hÉireann i gcomhthéacsanna Eorpacha agus idirnáisiúnta,

(b) cláir nua teilifíse nó craolacháin fuaimne chun litearthacht aosach nó litearthacht ó thaobh na meán a fheabhsú,



(c) cláir nua teilifíse nó craolacháin fuaimne a chothaíonn eolas agus tuiscint an phobail ar shaincheistanna domhanda a imríonn tionchar ar an Stát agus ar thíortha seachas an Stát,

(d) cláir Ghaeilge faoi mhíreanna (a), (b) agus (c),

(e) forbairt a dhéanamh ar chartlannú bunábhair clár le haghaidh gach ceann nó aon cheann de na saghsanna cláir atá sonraithe i míreanna (a), (b), (c), (d) agus (f), ar a n-áirítear forbairtí teicneolaíochta agus córais chun feabhas a chur ar an bhfáil agus an rochtain atá ar bhunábhar clár cartlannaithe, agus

(f) cibé bearta coimhdeacha is gá chun tacú le scéimeanna arna n-ullmhú faoi mhíreanna (a), (b), (c) nó (d).

(2) Maidir le scéim—

(c) féadfar maoiniú a chur ar fáil léi do thionscadail a bhaineann le nithe amhail taighde, measúnachtaí riachtanas, anailísí, staidéir féidearthachta agus treoirtionscadail i ndáil le fo-alt (1)(e), lena n-áirítear cibé tionscadail a ghabhfaidh an tAire de lámh nó a ghabhfar de lámh thar a cheann nó thar a ceann, agus

(3) Féadfar a fhoráil le scéim-

(c) go mbeidh maoiniú i mbliain áirithe dírithe -

(ii) aicmí áirithe tionscadal dá dtagraítear i bhfo-alt (1)(e).

Alt 155

(2) Is é cuspóir scéime i ndáil le cartlannú bunábhair clár a tháirgtear sa Stát a fhorbairt is scéim dá dtagraítear in alt 154 (1)(e), cur chuige comhtháite a fhorbairt maidir le bunábhar clár a chartlannú lena n-áirítear próisis agus formáidí stórála oiriúnacha a fhorbairt agus páirtithe leasmhara d'fháil rochtain ar bhunábhar agus oibleagáidí an Údarás mar atá leagtha amach i bhfo-alt (6), (7), (8) agus (9) d'alt 69 a urramú.

(3) Le linn scéim a ullmhú agus iarratais ar mhaoiniú a bhreithniú beidh aird ag an Údarás ar chuspóirí scéime.

Alt 156

(2) Féadfaidh an tAire, le ceadú an Aire Airgeadais, méid a íoc leis an Údarás as airgead a sholáthróidh an tOireachtas chun críocha deontas faoi scéim agus chun aon riarachán a dhéanamh ar scéim nó chun críocha caiteachas réasúnach a bhaineann le scéim, i leith gach bliana airgeadais, ar méid é is comhionann le 7 faoin gcéad de ghlanfháltais sa bhliain sin i leith táillí ceadúnais teilifíse.



Alt 157

(1) Déanfaidh an tÚdarás ciste a bhunú agus a chothabháil ar an lá bunaithe ar a dtabharfar an Ciste Craolacháin agus dá ngairtear an 'Ciste' sa Chuid seo.

Alt 158

(1) Déanfaidh an tÚdarás oibriú, éifeachtacht agus tionchar scéime a athbhreithniú tráth nach déanaí ná 3 bliana ón Acht seo a rith, agus gach 3 bliana ina dhiaidh sin, nó cibé tráth eile a iarrfaidh an tAire, agus tabharfaidh sé tuarascáil i scríbhinn don Aire ar an athbhreithniú.

(2) Déanfaidh an tAire cóip de thuarascáil faoi fho-alt (1) a leagan faoi bhráid gach Tí den Oireachtas a luaithe is féidir tar éis an tuarascáil a thabhairt dó nó di.

(3) Déanfaidh an tAire tuarascáil a thabharfar dó nó di faoi fho-alt (1) a fhoilsiú (lena n-áirítear í a fhoilsiú trí mheán leictreonach is féidir a léamh i bhfoirm inléite).



Aquisín 2 - Critéir mheasúnaithe

1. Réamh-mheastóireacht

Mar seo a leanas a dhéanfar an réamh-mheastóireacht ar iarratais ar mhaoiniú:

- An bhfuil an t-iarratasóir incháilithe chun iarratas a dhéanamh ar mhaoiniú faoin Scéim?
- Ar chomhlíon an t-iarratasóir na treoirlínte ar fad a bhaineann leis an gcomórtas agus ar chuir sé/sí an fhaisnéis uile is gá chun bealaigh?
- Chomh maith leis sin: de bharr maoiniú a fháil, an mbeadh an Bunábhar Clár atá le cartlannú ina ábhar sa bhreis ar chorpas an Bhunábhair Chlár atá ann cheana féin nó sa bhreis ar an méid atá de dhualgas ar an iarratasóir a sholáthar de bhun reachtaíocht atá ann cheana féin?

2. Measúnú straitéiseach

Ginearálta:

- A mhéad a dhéanann tograí an iarratasóra cuspóirí na Scéime um Chartlannú a chur chun tosaigh
- A mhéad a bhaineann luach straitéiseach le tograí an iarratasóra maidir leis na cuspóirí a chur i gcrích
- An bhfuil dea-struchtúr ar na tograí agus an dtagann an cur chuige atá á mholadh leis na treoirlínte idirnáisiúnta faoin dea-chleachtas?
- Réadúlacht thograí an iarratasóra trí chéile

Tionscadail a bhaineann le Lánas agus Cartlannú:

- An gcuideoidh na tograí le buanchoimeád, caomhnú, agus/nó athchóiriú Bunábhar Clár atá faoi bhagairt, ag imeacht as nó nár cartlannaíodh nó nach raibh teacht air roimhe seo?
- Cé chomh maith agus a thagann tograí an iarratasóra le ceann nó níos mó de théamaí agus seánraí an chláir?
- An gcuireann an t-iarratas le taighde agus leis an méid eolais atá ann cheana maidir le Bunábhar Clár a thairgtear sa Stát a chartlannú?



Digitíú agus Stóráil:

- Ar léirigh an t-iarratasóir an úsáid a bhainfí as próisis stórála oiriúnacha, lena n-áirítear próisis theicniúla agus teicneolaíochta, a bhfuil sé mar aidhm acu cuidiú le caomhnú, athchóiriú agus stóráil ina dhiaidh sin ábhar a thaifeadh i bhformáidí atá ag teip, nó a bheith i léig go luath?
- An gcloíonn an cur chuige beartaithe i dtéarmaí stóráil, catalógú agus aicmiú ábhair chraolacháin le caighdeán cheadaithe idirnáisiúnta?
- An gcuidíonn tograí an iarratasóra le feabhas a chur ar chumas an iarratasóra Bunábhar Clár a stóráil go héifeachtach, go cuí agus go slán?

Rochtain:

- Ar léirigh an t-iarratasóir go sásúil go gcomhlíonfaidh sé/sí aon reachtanna agus/nó comhaontuithe cóipchirt a bhaineann le hábhar?
- Cé na socruithe atá déanta ag an iarratasóir le go mbeidh teacht ar an mBunábhar Clár cartlannaithe ag páirtithe leasmhara?
- Cé na bearta atá ar intinn ag an iarratasóir chun feabhas a chur ar eolas an phobail ar chaomhnú, buanchoimeád agus úsáid an Bhunábhair Clár?
- Cé na socruithe speisialta, más ann dóibh, atá déanta le go mbainfidh daoine atá bodhar nó ar bheagán éisteachta agus/nó daoine atá dall nó ar bheagán amhairc brí agus sásamh as ábhar clár teilifíse agus as ábhar clár raidió?

Acmhainní:

- Leordhóthanacht, inrochtaineacht agus foinse maoinithe eile chun tacú le tograí an iarratasóra
- Leordhóthanacht, inrochtaineacht agus foinse na n-acmhainní eile is gá chun an tionscadal a phleanáil, a chur i bhfeidhm agus a thabhairt i gcrích lena n-áirítear an saineolas agus an t-eolas cartlainne riachtanach, saoráidí stórála oiriúnacha agus bogearraí/crua-earraí TF
- Leordhóthanacht, réadúlacht agus trédhearcacht thograí airgeadais an iarratasóra trí chéile
- An bhfuil sé ar chumas an iarratasóra an tionscadal a chur i gcrích de réir an chláir ama atá beartaithe?